



6. Tschanteda dal cussagl cumünel in marcaldi, ils 19.3.2014 a las 19.00 in chesa cumünela S-chanf

Presidi: Duri Campell

Preschaints: Gian Andrea Bott, Paolo Bernasconi, Jnes Barblan, Liun Quadri

Absaints:

Actuar: Duri Schwenninger

Tractandas:

1. Protocol
2. 0.211 Dumandas da fabrica
3. 0.110 Iniziativa „Artichel 15/contrats e convegnas intercumünelas“
4. 1.200 Circul d'Engiadin'Ota, consultaziun resultats da l'examinaziun da la spüerta trafic public
5. 0.212 Tscherna lavuraint stagiunel uffizi forestel
6. 1.300 Departamaint da construcziun, trafic e silvicultura, convegna amicabla regard la correctura da la via Engiadina, Cinuos-chel fin Brail Vest
7. 1.010 Swisscom SA, convegna vicendaivla per nüzzer datas da lingias sül program GIS Engiadin'Ota
8. 7.100 Schlargiamaint dals indrizs per l'alluntanamaint da l'ova persa e pel provedimaint da l'ova potabla Chauntaluf/FouraChagnöls, etappa 3/2014, credit fr.1'800'000.00
9. 0.210 Ertevels Reto Altorfer, dumanda per barat da terrain parcella nr. 90 cun part parcella nr. 47 / 656
10. 9.999 Varia

La glista da tractandas vain approveda cun metter inavous la tractanda 9, siand cha las trattativas nun haun pudieu gnir glivredas.

Protocol: Il protocol da la tschanteda dals 05.03.2014 vain approvo unanimamaing .

38 0.110 **Legislativa** **Iniziativa „Artichel 15/contrats e convegnas intercumünelas“**

Il president spiega, cha l'iniziativa es gnida inoltrada ils 26 favrer 2014 cul seguaint text: „As basand sün l'artichel 9 dals tschantamaints da la vschinauncha da S-chanf pretendan ils suotsegns d'agiundscher l'artichel 15 cun la seguainta alinea: "Artichel 15/contrats e convegnas intercumünelas, la radunanza cumünela approvescha tuot ils contrats e tuot

las cunvegnyas cun otras vschinaunchas". L'iniziativa es gnida suottascritta da 38 personas chi haun il dret da vuscher in chosas cumünelas. Las seguaintas personas velan scu ils prüms 5 suotsegnos: sar Jon Peider Lemm, sar Oscar Krüger, duonna Friederica Camichel, duonna Anita Parli e sar Mario Egler. Zieva cuorta discussiun decida il cussagl, cha l'iniziativa preschainta es valabla e cha quella vain suottamissa in üna prosma radunanza cumünela, tgnand aint il termin previs i'ls tschantamaints. Impü decida il cussagl cun 4 cunter 1 vusch da sustegner l'iniziativa e da na propuoner a la radunanza cumünela üna cuntraproposta.

**39 1.200 Uffizis circuitels e districtuels
Circul d'Engiadin'Ota, consultaziun resultats da l'examinaziun
da la spüerta trafic public**

La cumischiun dal trafic public ho decis da l'an 2012 d'examiner la spüerta dal trafic public, siand cha'l squitsch finanziael dal circul d'Engiadin'Ota da spargner cuosts i'l trafic public es creschaint. Impü es gnieu decis illa tschantada dal cussagl da Cumön dals 14 marz 2013, da tratter la ledscha per la nouva regulaziun da finanzas pür cur cha las pussibiliteds da spargner cuosts i'l trafic public sun examinadas. Ils resultats sun uossa avaintmaun e sun gnies documents. Aunz scu cha la cumischiun suottametta al cussagl da Cumön propostas, vegnan ils resultats suottamiss per üna consultaziun in nossa regiun. La cumischiun dal trafic public elavurescha zieva la consultaziun üna proposta a maun dal cussagl da Cumön. Il cussagl fo üna lectüra da la documentaziun e decida da piglier pusiziun seguaintamaing:

1. La spüerta per pendularis es buna, pels scolars satisfacenta. L'urari da tren tar las vschinaunchas cun üna staziun da tren dess gnir resguardo pü ferm.
2. A sun avaintmaun memma bgeras lingias dal trafic public chi nu rendan. Quellas stessan gnir scholtas. Medemmamaing quels cuors la bunura bod e la saira tard. L'urari da la stagiun bassa dess gnir prolungieu per ün'eivna.
3. Regiuns da turissem scu l'Engiadin'Ota nu paun praster da perder la qualited, spargner illa stagiun ota düraunt las uras da gestiun da las pendicularas nu po gnir in dumanda.

**40 0.212 Persunel
Tscherna lavuraints stagiunels uffizi forestel**

Daspö il cumanzamaint da quist an do que üna collavuraziun traunter las vschinaunchas da S-chanf e Zuoz a prouva. Nossa vschinauncha, respectivamaing noss silvicultur maina ils 2 uffizis forestels. Nossa vschinauncha surpiglia l'unic lavuraint stagiunel da la vschinauncha da Zuoz, a Mario Egler da S-chanf. Il cussagl decida da tscherner a Mario Egler da S-chanf scu nouv lavuraint stagiunel per l'uffizi forestel. L'impieghi cumainza ils 1. avrigl 2014 e düra fin ils 30 november 2014. Impü decida il cussagl unanimamaing da tscherner ils 2 lavuraints stagiunels da l'an passo, a Luca Togniascioli ed a Gian Fadri Carpanetti eir per quist an illa gruppa da lavur. Ils impieghis cumainzan ils 15.04.2014, respectivamaing ils 01.05.2014 e glivran ils 30.11.2014.

**41 1.300 Instanzas chantunelas e federelas
Departamaint da construcziun, trafic e silvicultura, cunvegna
amicabla regard la correctura da la via Engiadina, Cinuos-chel
fin Brail Vest**

Quist an vegnan pigliadas per mauns las lavuors per la correctura da la via Engiadina traunter Cinuos-chel e Brail. Scu prüm es planiso d'eriger üna nouva punt tar la val Punt' Ota. Impü es previs in püssas etappas, spartieu sü sün püs ans, da schlarger ed amegldrer il traiget da la via fin Brail. In quel connex ho suottamiss il departamaint chantunel üna cunvegna amicabla per ütiliser transitoricamaing terrain da las parcelas nr.

489 (ca. 249 m²) e 497 (ca. 917 m²), per installer il plazzel da fabrica. L'adöver transitoric vain indemniso cun fr. 0.40 per m². Impü dumanda il chantun da cumprer terrain da las parcelas nr. 489 arduond 249 m² per fr. 2.50/m², nr. 497 arduond 416 m² per fr. 2.50/m² e nr. 427 arduond 6 m² per fr. 5.00/m², siand cha quel vain sblutto cun schlarger la via. Il cussagl decida unanimamaing da propuner a la prosma radunanza cumünela d'accepter la curvegna amicabla.

**42 1.010 Imsüraziuns, termaziuns, geometer
Swisscom SA, curvegna vicendaivla per nüzzer datas da
lingias sül program GIS Engiadin'Ota**

La cumünaunza d'interess GIS Engiadin'Ota ho elavuro insembel culs respunsabels da la Swisscom SA üna curvegna, chi regla il barat da datas. Concretamaing as tratta que dal seguaint barat da datas: sül program GIS Engiadin'Ota vegnan chargedas sü las datas da lingias da la Swisscom e quellas staun a disposiziun a las vschinaunchas. Cuntrariamaing ho la Swisscom SA il dret d'access tals catasters da lingias da las vschinaunchas. Cun quistas imsüras as po in avegnir impedir dans vi da lingias chi nu sun cuntschaintas ad üna u l'otra vart. Il cussagl decida unanimamaing da der il acconsentimaint per suottascriber la curvegna.

**43 7.100 Chanalisaziun/sarinera
Schlargiamaint dals indrizs per l'allontanamaint da l'ova persa e
pel provedimaint da l'ova potabla Chauntaluf/Foura Chagnöls,
etappa 3/2014, credit fr.1'800'000.00**

Per glivrer l'ultima etappa es previs da fer quist an las lavuors in connex cul schlargiamaint dals indrizs per l'allontanamaint da l'ova persa e pel provedimaint da l'ova potabla in Chauntaluf/Foura Chagnöls. Ils cuosts d'investiziun sun previs il preventiv 2014 cun 1,0 milliuns francs e tenor offertas inoltredas muntan quels sün arduond 1,8 milliuns francs. Il cussagl decida unanimamaing da propuner a la prosma radunanza cumünela da deliberer il credit brüt ill'otezza da fr.1'800'000.00.

44 9.999 Varia

Da quista tractanda nu vain fat adöver.

A las 21.30 vain la tschanteda alveda.

In buna fè

L'actuar:
D. Schwenninger

I